



大清文宗協天翊運執中垂謨懋德振武聖孝淵恭端仁寬敏
顯皇帝實錄卷之一百九十五

咸豐六年丙辰夏四月丁亥朔享
太廟。

上親詣行禮。○諭軍機大臣等。據崇恩奏。派調來東官兵豫籌
分布。並邵燦等奏。催兵分撥堵禦各一摺。昨因鄭魁士。勦辦
懷遠捻匪。身受重傷。兵力又單。諭令英桂將伊興額。德昌所
帶馬隊一千名。暫留助勦。本日據邵燦等奏。伊興額已帶馬
隊五百名。於三月十二日抵徐。其德昌之兵。亦陸續將至。因
揚營尚需兵力。先其所急。催令星夜赴揚。此項馬隊。自未便

再令折回皖境。惟懷遠一帶。捻匪猖獗。鄭魁士官兵不敷。攻
勦。急應另籌調派。茲據崇恩奏。東省兗沂曹各屬。距賊較遠。
邊界靜謐。所有前調赴東協勦之綏遠城滿洲。土默特蒙古
兵共一千名。昨經德勝奏。需用馬匹。已遵旨購採齊備。分起
啟程。不日當抵直境。著桂良飭令改赴河南。歸英桂調遣。無
庸繞道山東。致多周折。其吉林黑龍江餘丁各五百名。到直
時。著桂良飭赴懷遠鄭魁士軍營。統歸英桂調遣。並著崇恩
催令此項馬隊。取道徐州。迅速前進。至捻匪現仍屯聚蕭宿
永夏一帶。懷遠兵力過單。經庚長等。分撥直隸兵五百名。協
勦。換回伊興額等馬隊。仍恐兵力不敷。現將新調曹單防堵

之吉林黑龍江餘丁馬隊一千名。改調懷遠。將此由六百里
各諭令知之。○欽差大臣德興阿等奏。毀平賊壘。逆匪分竄
西南。現派兵在儀揚交界夾擊。得旨。西竄之賊。勦辦若何。占
踞何處。著迅速具奏。○貸福建海壇鎮。閩安協。兵丁穀價銀。
○撫恤琉球國。遭風難夷如例。○戊子。諭內閣。德興阿。翁同
書。奏。克復江浦縣一摺。逆匪竄踞江浦縣城。經張國樑。武慶
移師。於二十三日。四面圍攻。該逆由南門衝出。我兵乘勢掩
殺。立將縣城克復。旬日以來。浦口。江浦。連次攻克。勦辦尚為
得手。著德興阿等。督飭將弁。節節進攻。務將三汊河等處賊
巢。迅速掃清。毋稍延緩。○諭軍機大臣等。德興阿。翁同書。奏。

探聞儀徵失守。現擬分派各路兵勇。急圖攻克等語。前因儀徵兵單。浦口克復後。諭令德興阿等。即飭張國樑帶兵由六合直趨儀徵。會合新調各兵。相機勦洗。本日據奏。副都統穆克登額帶兵馳抵儀徵二十里鋪。即聞李志和等營盤被賊燒毀。儀徵業經失守。毗連山陽交界之蔣壩地方。該處商賈輻湊。米艘停泊甚多。若令闖入。則清淮全局震動。而六合天長一帶。在在空虛。尤須加意防範。不可稍有疏虞。著德興阿等。嚴飭先經派出之索昌等馬隊。並鞠殿華。博奇等馬步隊。會合張國樑。新克江浦之得勝兵勇。趕緊將縣城克復。毋許稍有稽遲。致再蔓延為患。並著將儀徵縣知縣范驤。未經稟

報緣由。及現在下落。查明具奏。將此由六百里加緊諭令知之。○又諭。庚長奏。庫存銀兩無幾。未能撥借皖營一摺。據稱河庫存銀三萬餘兩。業已動用一萬餘兩。其餘尚須留為兵餉等用。所有前諭撥借皖營銀二萬兩。請於安徽藩庫欠解河餉銀內。就近提借等語。皖省庫款久已無存。積欠兵餉。較各軍營為尤甚。該河督於奉撥之款。意存畛域。藉詞推諉。殊屬非是。庚長現經諭令督辦兩淮鹽務。所有皖省餉銀。河庫既無款可借。著即於兩淮鹽課項下。籌撥銀二萬兩。派員迅速解往廬州。以資接濟。將此由五百里諭令知之。○己丑。諭內閣。朕綜理庶物。恪遵

列聖成憲。無日不兢兢業業。以敬。

天愛民為心。因思知人安民。垂於古訓。凡文武各員。如果才猷素裕。著有成效者。未嘗不破格錄用。即大小臣工。條奏事件。苟有益於國計民生。亦無不虛心採擇。見諸施行。所冀嘉言罔伏。野無遺賢。庶可以漸臻上理。况近年以來。粵匪未平。河流未復。各省地方。亦間有偏災。赤子何辜。遭此慘毒。朕恫瘝在抱。軫念民依。憂勤惕厲之衷。諒中外臣民所當共喻。本日據侍郎王茂蔭奏稱。天時人事。危迫日深。致力之方。惟在天心之早轉。又謂民之視聽。一在省己。一在用人。二者皆本於一心。而其樞則繫乎聽言等語。持論切當。與朕心適相符合。

當此時事多艱。力圖補救。朕惟省躬克己。於用人行政之間。慎益加慎。以期默邀。

天眷。海宇敕安。中外臣工。亦當夙夜靖共。交相警惕。以副朕孜孜求治之心。實有厚望焉。○又諭李鈞奏。運河漫塌各口。亟應撥款堵築一摺。山東省運河北路。上年刷塌各缺口。俱係應修之工。自應趕緊堵築。以衛民田。所估工需銀八千二百餘兩。著崇恩按照前定章程。全數撥交。該河督即督飭該管道廳。迅速興辦。工竣後覈實報銷。如查有草率偷減情弊。立即嚴參著賠。以重要工。○諭軍機大臣等。向榮奏儀徵失守。撥兵應援等語。張國樑赴援之軍。連克浦口。江浦。本擬飭令

乘勝攻復儀徵。嗣因賊由景德鎮竄入徽境。復陷婺源祁門。進擾黟縣太平縣境。亦有賊蹤。經向榮將該總兵調回應援。而儀徵毗連六合。亦須急圖克復。據向榮奏稱。派總兵明安泰。統帶李定太。陶茂森。鎮筻兵。仁勇。台勇。共一千名。由石埠橋渡江。馳赴六合防勦。此項兵勇。既經渡江。即當會同攻克儀徵縣城。毋得專事防堵。德興阿等前已調派穆克登額。帶領吉林官兵赴援。並有索昌。鞠殿華。博奇等馬步各兵。及由吉爾杭阿派往之遊擊張汝霖。所帶壯勇千二百名。會合勦辦。著德興阿等飛飭穆克登額等。協同江南援師。乘逆賊踞城未久之時。四面圍攻。務將儀徵克復。毋令旁竄。以保江北。

大局。其三。漢河賊壘。並著德興阿。鄧紹良等。趕緊埽除。毋稍延緩。將此由六百里加緊諭令知之。○庚寅。

上詣

永安寺。

時應宮。

福佑寺。

昭顯廟拈香。○諭內閣。葉名琛等奏。請補行廣東乙卯科鄉試一摺。前因廣東省軍務未竣。暫將文武鄉試展緩。現在地方業已肅清。自應循例補行。所有該省正副考官。著禮部先期具題。其應如何改道赴粵之處。並著兵部查明具奏。○江

南提督和春等奏。清淮防堵較緩。請仍飭伊興額等馬隊馳回宿州。得旨。伊興額等馬隊現已至德興阿軍營。又調吉林黑龍江續到餘丁馬隊協勦捻匪矣。○賞已革大學士訥爾經額六品頂帶。○予安徽陣亡知縣汪人廉祭葬世職。並建專祠。千總狄永順祭葬世職。六品頂帶汪才武等十二名。賞卹如例。○朝鮮國使臣朴齊憲等三人。於神武門外瞻覲。○辛卯。

上以常雩祀

天於

園丘。自是日始齋戒三日。○壬辰。諭內閣。戶部奏。遵議大凌河

馬廠開墾地畝一摺。奉天錦州府屬大凌河東西兩岸地面遼闊。前據書元奏請。准令附近旗民人等墾種輸租。固為籌畫經費起見。惟該處水草暢茂。為歷年牧放官馬之區。孳生蕃庶。利益無窮。若將附近廠地漸次開墾。勢必侵占牧養。於馬政大有妨礙。著照戶部所議。恪遵舊制。以重牧務。該侍郎請令開墾之處。著不准行。至錦縣民人穆亭揚徑自討種地畝。並未據該處咨報。輒敢私墾至八千畝之多。實屬大干例禁。著承志會同書元。景霖。確實查勘。儻在馬廠界內。即將私墾地畝平毀。照例懲辦。嗣後並著盛京將軍。戶部。奉天府府尹等。隨時認真查察。如該旗民人等。尚有在廠內私種。及吏

胥包庇隱匿各情弊一併從嚴究辦。○諭軍機大臣等前因江西省賊勢蔓延。疊諭葉名琛等迅撥精兵五六千名馳赴贛州進剿。現在江西賊勢披猖。劉長佑一軍克復萍鄉以後。尚阻袁州。周鳳山兵勇近在樟樹鎮接仗失利。曾國藩雖調集兵勇力保省垣。而外援不至。省城終屬孤危。設稍疏虞。勢將由廣信玉山闖入浙境。大局不堪設想。江省待援情形。誠屬萬分喫緊。因思大兵赴援。非有大員統帶。不足以嚴軍律而壯先聲。著葉名琛等將前諭調赴江西精兵五六千名。即飭令提督崑壽統帶前往。剋日啟程。由贛州一帶奮力進剿。期將失守各城次第克復。保衛省垣。至江西餉需久匱。無可

設法。該督既撥兵赴援。所需軍餉。即著該督等寬為籌備。源源接濟。毋令缺乏。並著將該提督帶兵啟程日期。迅由海道馳奏。至崑壽啟程後。所有提督印務。著葉名琛派員署理。將此由六百里諭令知之。○又諭前因英桂奏歸德漸已肅清。諭令迅赴皖豫交界督兵進剿。此後情形。未據該撫續行奏報。捻匪於四出擄掠之後。暫回巢穴。若不趁其麇集之時。聚而殲旃。則此後出巢。勢必愈熾。前諭派赴河南之綏遠城等滿蒙官兵一千名。及派赴懷遠之吉林黑龍江餘丁各五百名。本日據桂良奏稱。該兵丁等現已陸續過境。即日可抵皖豫。和春等派往懷遠官兵。當亦可到。著英桂一面催提。一面

督飭西凌阿等所帶馬隊及邱聯恩等所帶兵勇剋日移兵前進直搗雉河老巢並嚴檄鄭魁士傅振邦各帶兵勇與豫省官兵兜圍合剿以為一鼓殲擒之計該撫身總師干責無旁貸儻意存觀望遷延不進致擒匪復出肆擾難於收拾則法紀具在斷難曲邀寬宥也將此由六百里加緊諭令知之○以福建勦除延平府屬匪徒出力賞同知金萬清花翎以知府升用○撫恤朝鮮國遭風難夷如例○癸巳

上詣

南郊齋宮齋宿○諭內閣邵燦等奏徐州官兵出省勦匪大勝一摺擒匪張樂行等分黨滋擾三月十七日署徐州鎮總兵

傅振邦等於王維嶽莊截勦殺賊三百餘名又有賊首李月及孟繼沅等屯聚永城縣苟村等地方二十等日侍衛伊興額與傅振邦等各帶兵勇馳往該匪列陣迎拒伊興額帶領馬隊衝入賊陣生擒賊首孟繼沅餘賊驚逃我軍追殺十餘里將該處賊巢全行焚毀共斃賊匪二千餘人生擒首夥六十二名奪獲軍械甚多擒匪大股分擾徐宿等境此次大加懲創焚其巢穴所辦尚為得手著邵燦等飭該署鎮等與豫省大兵會合力殄兇鋒所有此次打仗出力員弁兵勇並著擇尤保奏○又諭邵燦等奏募勇過境請飭先期知照等語此次侍郎曾國藩募勇千餘人前赴江西由山東行抵江蘇

宿遷等處。並無該侍郎咨會印文。僅據勇目等持有鈔錄。劉
豪。地方官無憑查覈。殊不足以昭慎重。現經邵燦等。已將此
起募勇派員督押出境。嗣後軍營招募民勇。務於經過地方
備用印文先期知照。並著派員沿途管帶。不得稍涉滋擾。
又諭德興阿奏。遵查陳金綬。雷以誠。奏報不符。先陳大概情
形一摺。據稱揚州收復。雷以誠。與陳金綬。是日泊船萬福橋。
並未聞督隊進攻。該革員前奏。所稱東路疊次殺賊等語。全
無影響。且呈繳所獲旗幟各件。復與原報數目不符。顯係事
後捏飾。希圖脫罪。陳金綬。雷以誠。以幫辦大員。於瓜州賊匪
出撲。並不實力督率。致令兵勇潰散。迨收復揚城後。復敢捏

稱助勦。辜恩昧良。殊堪痛恨。陳金綬業經病故。雷以誠著即
拏問。交德興阿等嚴行審訊。請肯定奪。所有交查各件。仍著
逐一查明具奏。○浙江巡撫何桂清奏。江西逆匪竄入婺源
祁門。即經攻勦出嶺。現籌援勦太平。得旨。覽奏一切情形均
悉。布置機宜。尚屬周妥。○以江蘇儀徵縣城被賊竄陷。革總
兵官李志和。遊擊景和。知縣范驤職。仍留營效力。○甲午。常
雩。祀

天於

圍丘。

上親詣行禮。○詣

關帝廟拈香。○諭內閣。恆春奏。攻破賊寨。生擒首逆一摺。貴州郎岱廳苗匪。勾結匪徒朱大黃瓜等。占踞馬鞍山。曼經官軍攻勦。仍敢負固拒守。恆春督令署副將陳得功等。悉力進攻。兵丁楊太。冒險先登。兵練鼓勇繼進。燒毀賊寨。轟斃賊匪多名。該逆抵禦不住。由崖後縋岸潛逸。兵勇齊入賊壘。按斬二百餘名。生擒首逆盧阿米。其逃出之賊。均被伏兵截殺。殆盡。復探知倡亂逆首朱大黃瓜。暨其妻陳氏。逃往抵耳寨。經已革遊擊申有謀。躡蹤擒拏。該寨犴苗畏懼。即將該逆首等一併網獻。各苗寨漸就肅清。著恆春嚴飭將弁。逐節按捕。俾上游一帶。速臻靜謐。再行移師下游。次第勦辦。○署貴州布

政使王成璐。因病解任。以廣東按察使沈棣輝。為貴州布政使。調湖南按察使周起濱。為廣東按察使。以甘肅鎮迪道毓科。為湖南按察使。○以禮儀嫺熟。賞贊引官察杭阿。五品頂帶花翎。○以貴州擒獲首逆朱大黃瓜。復已革遊擊申有謀職。○乙未。諭內閣。德興阿等奏。官軍攔擊竄匪。大獲全勝一摺。本月初二日。儀徵賊匪。由硯臺山至廟山一帶。西北竄越。意圖繞襲六合。經德興阿。派令協領富明阿等。督帶馬隊。抄前攔截。遇該匪大股四五百人。斃賊極多。該逆倉猝圖遁。又被官兵民團。在山坳按捕。總兵鞠殿華等。在後兜勦。德興阿親督馬步隊。由中路進攻。將賊隊衝為兩截。乘勝掩殺。其廟

山敗賊回奔。又經富明阿等。沿途追殺十餘里。共斃賊八百餘名。生擒三十六名。內偽丞相等五名。溺斃無算。奪獲軍械多件。是日鄧紹良等分攻三汊河。亦轟斃賊匪數十名。此次截勦儀徵竄匪。尚為得手。著德興阿。即督飭各員弁。嚴扼西北山路。一面分攻三汊河。務期迅速埽除。毋令竄逸。○諭軍機大臣等。德興阿等奏。儀徵賊竄北山。圖襲六合。官兵攔擊獲勝。並請催伊興額馬隊。及撥紅單船歸陳國泰。經管各摺片。據稱德昌馬隊業已過浦。計日可到揚營。山東陝西官兵。迄無抵淮消息。伊興額馬隊尚在徐宿等語。本日據邵燦等奏。皖匪大股窺伺徐州。伊興額會同傅振邦。迎勦獲勝。惟賊

自懷遠雉河來者。絡繹不絕。是徐州現在防勦情形。極為喫緊。伊興額在該處勦賊。正在得手。既未能剋日抵揚。即將該侍衛留於徐州。勦辦擒匪。至西安馬隊官兵一千名。原係赴清江之兵。既據英桂奏稱。勦匪正在喫緊。若遽行裁撤。仍赴清江。恐少此勁旅。致滋貽誤。自係為移緩就急起見。所有此項馬隊。並准其暫留豫省。以資防勦。其綏遠城土默特馬隊官兵一千名。仍遵前旨。赴河南歸英桂調遣。毋庸改赴清江。該撫軍營兵力已厚。務即督飭邱聯恩等。帶兵直抵雉河集賊巢。為埽穴擒渠之計。毋得日事遷延。自干咎戾。至揚營兵力尚單。所有派赴懷遠之吉林黑龍江餘丁共一千名。行抵

徐州著邵燦等留五百名與伊興額等協勦擒匪其餘五百名即令馳往揚州軍營並著邵燦等飭催山東兵一千名直隸兵一千三百名迅赴揚營統歸德興阿調遣紅單船前幫十三隻已經入江據該大臣奏稱浦口觀音門均為賊船出沒之所土橋毗連儀六尤關緊要著准其將紅單船十隻歸陳國泰經管仍嚴飭該員分布要隘嚴密堵勦江北水師原歸德興阿調遣軍情緊要豈能事事待旨而行邵燦等所請蔣壩捐釐仍循舊章辦理等語蔣壩兵勇口糧不敷若將捐釐改歸皖省則該處無款支應所奏自係實在情形著准其照舊辦理將此由六百里加緊各諭令知之○又諭廉兆綸

奏賊蹤旁竄籌辦廣信募勇情形並王懿德呂佺孫奏添調兵勇赴江協勦各一摺昨據何桂清奏江西樂平景德之賊竄擾祁門婺源等處經練勇堵勦該逆遂分股從羊棧嶺箬嶺一帶竄入太平縣境現在安仁以北賊氛稍戢省城水路漸通廉兆綸暫駐廣郡新募之勇及舊招守隘各勇約有二千自應多方激勵實力訓練以資彈壓萬青藜因浙西軍情未定暫在餘杭駐劄晏端書周起濱繆梓已至玉山常山等處相機布置秦如虎一軍經何桂清調赴甯國勦辦一俟該處得手即當統軍會合萬青藜前往廣饒其由閩赴江之兵勇並經王懿德等調足三千名派副將張從龍陳上國管帶

探明江西何路緊急。即由何路進兵。廉兆綸惟當督飭地方官。令將新舊練勇。協助官兵。堵守要隘。一俟閩浙援師趕到。即可探賊所向。漸次翦除。至該學政所探江西省城。有分遣兵勇由進賢往攻撫州。及派李元度由饒州取道安仁合剿之信。仍當確探消息。隨時奏報。其閩浙援剿之軍。並著知照曾國藩文俊。俾得通籌全局。合力勦辦。將此由六百里諭令知之。○又諭。明誼等奏。請撥經費一摺。甘肅省應找撥塔爾巴哈台咸豐四五兩年。並六年經費。共銀六萬三千六百八十餘兩。前經易棠咨行該大臣。以無款可籌。擬俟山陝報解到日。再行撥解。甘省庫項竭蹶。自係實情。惟該處官兵月餉。

全賴此項支放。前因經費支絀。已將鹽菜銀兩減半發給。若再不能接濟。於防務殊有關繫。著易棠查明甘省應行找撥塔爾巴哈台經費銀兩。設法通融。先行撥解一半。以濟要需。將此諭令知之。○以河南鹿邑縣等處勦擒獲勝。復已革總兵官邱聯恩。崇安職。賞委營總莫爾賡。阿花翎。餘加銜升復有差。○予江蘇徐州陣亡防禦開奇哩。祭葬世職。○丙申。上詣清夏齋。

如皇貴太妃前行禮。○幸圓明園。○諭內閣。昨據御史伍輔祥奏。參總理直隸糧臺前任順天府府尹張起鵠。侵漁帑項。當派穆蔭將該員所辦糧臺報銷文冊查封。所有張起鵠被參

寶鑑卷之五
各款著派花沙納全慶秉公查辦據實具奏○又諭舒興阿
奏漢回互鬪滋事派兵勦辦一摺雲南楚雄府屬漢回構釁
二月間因驃練殺斃回民多名回民亦糾外匪赴南安州城
傷斃漢民三月初二日有臨民率驃練五六千人在富門村
一帶互鬪並敢進城殲斃回民數十打毀住屋攫取衣物回
民躲入衙署復被按殺並攫取軍裝什物署南安州事劉名
世吏目蔡家珍汎弁許春元因城內漢回逃散輒即帶印帶
犯徑赴郡城均著先行撤任交舒興阿查訊該文武等如有
規避別情即行從嚴叅辦該漢回等互鬪滋事業經舒興阿
酌派官兵催令提督文祥前往勦辦即著該撫督飭該管文

武妥為彈壓秉公辦理務昭平允毋令再生事端○欽差大
臣德興阿等奏收復儀徵縣城並截賊旁竄情形得旨攔勦
機宜實為扼要○丁酉諭內閣駱秉章奏請借漕折銀兩接
濟軍餉一摺著准其將糧道庫徵存五年漕折等款銀兩隨
時提撥軍需項下支用事竣後據實造冊報部作正開銷○
諭軍機大臣等邵燦等奏催調各路官兵援勦一摺捻首張
樂行因屢被徐州官兵擊敗撤回懷遠賊黨分踞永城馬村
橋宿州柳子集等處意圖窺伺徐州傅振邦兵力尚單昨已
有旨將伊興額留徐協勦即可飭該侍衛將所帶馬隊探明
賊氛何處猖獗幫同傅振邦勦辦直隸防兵一千八百名除

羅玉斌所帶五百名業已赴徐。其餘一千三百名並准暫赴傅振邦軍營助勦。其派赴懷遠之吉林黑龍江餘丁一千名。昨諭邵燦等留五百名於徐州。分五百名令赴揚州。此項餘丁到徐後。著邵燦等將直隸防兵一千三百名酌分一半。或一千名。飭令馳赴揚州軍營。交德興阿調遣。擒匪既全力窺伺徐境。則雉河集老巢當必有隙可乘。英桂統轄兵勇為數不少。著即飭邱聯恩等直抵賊巢。痛加勦洗。若但徘徊豫境。致失事機。恐難當此重咎。將此由六百里各諭令知之。○以理藩院左侍郎愛仁為繙譯會試正考官。大理寺少卿孟保為副考官。○改鑄浙江天台縣知縣印信。從巡撫何桂清請

也。○戊戌大學士兩廣總督葉名琛奏謝賞福壽字恩。得旨。本年三月二十三日。大阿哥生。朕深蒙

天

祖之恩。實為欣感。因符卿謝摺未聯之意。故特諭卿知。○以鑲紅旗護軍統領春佑暫署京營左翼總兵。○改鑄江蘇嘉定縣知縣印信。從巡撫吉爾杭阿請也。○己亥諭內閣。現在孝靜康慈皇后梓宮。應加漆飾。著派載齡敬謹監視。所有需用工匠及漆斤物料。著工部堂官揀派妥員帶往。敬謹承辦。○又諭曾國藩等奏陸軍先後獲勝。克復進賢縣城一摺。江西逆匪自本年二月間分竄進賢等處。經曾國藩等飭令候選

同知李元度。候選知府鄧輔綸。候補同知林源恩。會同進剿。李元度自湖口拔營赴饒。二十三日。逆匪分路來撲。我軍分三路抄擊。殺賊六七十名。餘賊奔潰。追入湖口。三月十一日。鄧輔綸等督帶兵勇。沿隄截剿。該逆奔回進賢縣。我軍追擊十餘里。共斃匪二百餘名。奪獲旗幟刀矛多件。十二日。林源恩帶勇五隊當先。鄧輔綸領五隊繼之。各勇梯繩登城。大呼同進。當將縣城克復。進賢為省東要路。此次兩戰克復。辦理尚屬得手。即著飭令李元度等會合兵勇。迅復撫州。毋令逆匪久踞蔓延。○又諭。蔣霽遠奏查明失守汎城。員弁並無逃避等語。前因苗匪竄撲大塘汎城失守。經該撫將署州判

王問政。守備李應發。奏參革職確查。茲據奏稱。該員弁實係禦賊在外。以致汎城失陷。尚無逃避情事。現在副將佟攀梅克復大塘汎城。該員弁等帶領團練。擒獲著名匪首數十人。先因齊團遲延。未及隨同克復。尚屬有因。王問政。李應發。業經革職。仍著隨營效力。以觀後效。○諭軍機大臣等。蔣霽遠奏。餉需急迫。請飭通那撥解一摺。貴州兵勇。欠發鹽糧。為數甚鉅。僅據粵海關撥解稅銀五萬兩。不敷支給。日有鼓譟之虞。著黃宗漢。於四川省不論何款。迅即籌撥銀十五萬兩。分起解往黔省。其廣東省應解貴州銀十五萬兩。著葉名琛等。即飭委員迅速解還四川。以清款項。至陝西欠解貴州銀十

萬六千餘兩。並著吳振斌。速即籌款撥解。毋再遷延。將此由
六百里各諭令知之。○以水軍收復江西新淦縣城。並樟樹
鎮。勦賊出力。賞復都司孫昌國。花翎。千總李逢春等。藍翎。餘
升擢有差。○以克復貴州羅斛汛城。賞守備劉尊權。汪文鈞
花翎。外委劉助祿等。藍翎。餘升擢有差。○以江西袁州府並
萍鄉縣城被賊竄陷。革副將蔣益輝。知縣萬清職。知府紹德。
知縣錫榮。革職留營效力。○以隨同官兵克復江西豐城。進
賢縣城。予前失守知縣張韶南。史昌壽。革職留任。○庚子。諭
內閣。葉名琛。柏貴。奏。續獲洋匪審辦。並請將出力人員酌保
一摺。廣東澳門洋面匪船竄出外洋。經官軍於上年夏間。疊

次勦捕。擒斬甚多。餘匪分路逃竄。復經提督吳元猷。督飭水
師。及沿海各文武。陸續圍捕。斬馘多名。並生擒三百四十七
名。解省審辦。計自上年夏間起。至本年春間止。各路殲擒洋
匪。不下二千餘名。奪獲並燒沈各匪船。一百四十餘隻。辦理
尚屬認真。所有在事文武員弁。著該督等。擇其尤為出力者。
秉公保奏。候朕施恩。○諭軍機大臣等。前因伊興額馬隊。已
有旨留於徐州助勦。當經諭令邵燦。庚長。將派赴懷遠之吉
林黑龍江餘丁。酌分五百名。前往揚州。其直隸防兵。除已赴
徐州五百名外。其餘一千三百名。亦令邵燦等酌度。或分一
半。或分一千。馳赴德興阿軍營。本日據德興阿等奏稱。官兵

不敷派撥。仍請飭催伊興額馬隊。及直隸防兵。自係未經接奉前旨。約計此時。山東官兵一千名。當可先後過浦。吉林黑龍江餘丁。及直隸防兵。亦當陸續到齊。著邵燦等速將已到之兵。遵旨分撥。未到之兵。趕緊催提。德興阿等。於此項官兵到揚後。即妥為布置。毋稍疏忽。至軍營馬隊步隊。本宜相輔而行。無論旗營綠營。但能調度得宜。皆可得力。德興阿身為統帥。非前此專帶馬隊可比。鄧紹良久。歷戎行。於步隊情形。尤為熟悉。自應妥籌調遣。於應用馬隊之處。固宜加意激勵。即應用步隊之處。亦當認真駕馭。使之互相奮勉。方收實效。翁同書既係幫辦軍務。即應與德興阿同在一處。方可就近

商酌軍情。翁同書著即馳往德興阿軍營。商辦一切。不必遠駐邵伯。其從前在營文員。人數過多。並著翁同書嚴加裁汰。酌留實在可用者數員。以資差委。揚營積習已深。必須大加整頓。該大臣等務當同心協力。以振軍威。毋蹈從前故轍。各營應給兵餉。並著傳諭文煜。源源接濟。均勻支給。毋使偏枯。缺乏。致令有所藉口。將此由六百里加緊各諭令知之。○浙江巡撫何桂清奏。請飭王茂蔭。回籍辦理團練捐輸事宜。得旨。張芾雖非皖人。人尚直爽。自應仍責其妥為勸捐。不必更張。所請勿庸議。○以勦辦廣東東莞等處匪徒出力。賞參將梁顯揚。都司尹達章。黃彬。守備陳貞標等。花翎千總馮瑞林。

寶鑑卷之五
等。藍翎。餘升擢有差。予陣亡都司王振高。祭葬世職。○辛丑。諭內閣。承志等奏。金州等處續有地震一摺。上年冬間。奉天金州地震。曾經降旨。將該處坍塌旗民房屋。給予修費。並著地方官妥為安置。毋令失所。茲據奏稱。查明金州地方。自正月。至三月間。續報地震。雖未壓傷人口。而城堞民房。均有震壞。覽奏。曷勝廕念。所有震倒旗民住房四十五間。著一體給予修費。以示體恤。其城垣等工。歸入報部工程案內辦理。仍著承志等。詳查該處有無續震情形。隨時具奏。○命署刑部右侍郎和潤。馳往盛京。會同工部侍郎錫齡。查辦事件。○以都察院左副都御史聯奎。署刑部右侍郎。○以鑲藍旗蒙古

副都統巴雅爾綽克托。署正藍旗護軍統領。○調正紅旗漢軍副都統烏爾棍泰。為正紅旗滿洲副都統。以山海關副都統富勒敦泰。為正紅旗漢軍副都統。○調錦州副都統定福。為山海關副都統。以正紅旗滿洲副都統侍順。為錦州副都統。○

大清文宗協天翊運執中垂謨懋德振武聖孝淵恭端仁寬敏
顯皇帝實錄卷之一百九十五

